

Na osnovu člana 193. stav 2. Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", broj 39/03), Vlada Federacije Bosne i Hercegovine, na prijedlog Federalne uprave civilne zaštite, donosi

UREDBU

O VRSTI, KRITERIJIMA I POSTUPKU ZA DODJELU PRIZNANJA I NAGRADA CIVILNE ZAŠTITE

I OSNOVNE ODREDBE

Član 1.

Ovom uredbom utvrđuju se vrste priznanja i nagrada civilne zaštite, izgled, kriteriji i postupak za dodjelu tih priznanja i nagrada za uspješan rad i angažovanje u oblasti zaštite i spašavanja.

Član 2.

Priznanja i nagrade su javna priznanja koja su dodjeljuju za naročito uspješan rad, djela i zasluge u oblasti zaštite i spašavanja koja zaslužuju opće poštovanje i isticanje.

U skladu sa odredbama stava 1. člana 193. Zakona o zaštiti u spašavanju ljudi i materijalnih dobara od prirodnih i drugih nesreća (daljem tekstu: Zakon), priznanja i nagrade se dodjeljuju građanima, udruženjima građana, humanitarnim organizacijama, privrednim društvima i drugim pravnim licima, štabovima, jedinicama i povjerenicima civilne zaštite, službama zaštite i spašavanja, općinskim sužbama za upravu, kantonalnim i federalnim organima uprave i upravnim organizacijama na području Federacije Bosne i Hercegovine (u daljem tekstu: Federacija).

Član 3.

Priznanja i nagrade, u pravilu, dodjeljuju se povodom 1. marta Dana civilne zaštite Federacije, a izuzetno, mogu se dodjeljivati i u drugim prilikama.

II VRSTE PRIZNANJA I NAGRADA

1. Vrste priznanja i nagrada

Član 4.

Kao priznanja i nagrade civilne zaštite ustanovljavaju se:

- 1) Plaketa civilne zaštite;
- 2) Zlatna značka civilne zaštite;

- 3) Pismena pohvala civilne zaštite;
- 4) Novčane i materijalne nagrade civilne zaštite.

2. Oblik i sadržaj Plakete civilne zaštite

Član 5.

Plaketa civilne zaštite (u daljem tekstu: Plaketa) je okrugla metalna ploča, prečnika 40 mm. Na ploči je reljefno utisnut međunarodni znak civilne zaštite sa grbom Federacije Bosne i Hercegovine u sredini. Plaketa je oivičena lovorovim vijencem srebrenaste boje. Podloga Plakete je četverougla ploča, dimenzija 75x65mm. Na četverougloj ploči, sa spoljnje strane lovorovog vijenca ispisan je naziv "Civilna zaštita Federacije Bosne i Hercegovine" latinicom i ćirilicom.

Plaketa se predaje u kutiji plave boje, čija je unutrašnjost prilagođena za smještaj plakete i sa utisnutim grbom Federacije Bosne i Hercegovine, zlatne boje na poklopcu kutije.

Plaketu, sa odgovarajućom diplomom, dodjeljuje komandant Federalnog štaba civilne zaštite, na prijedlog direktora Federalne uprave civilne zaštite.

3. Zlatna značka civilne zaštite

Član 6.

Zlatna značka civilne zaštite (u daljem tekstu: Zlatna značka), po motivu i reljefu, identična je Plaketi, ali bez lovorovog vijenca. Zlatna značka je rađena od tombaka, okruglog je oblika, prečnika 12 mm, a po površini reljefa i pozlačena. Na poledini značke pričvršćena je igla.

Zlatnu značku dodjeljuje komandant Federalnog, odnosno komandant kantonalnog štaba civilne zaštite, na prijedlog direktora Federalne, odnosno kantonalne uprave civilne zaštite.

4. Pismena pohvala civilne zaštite

Član 7.

Pismena pohvala civilne zaštite (u daljem tekstu: Pismena pohvala) dodjeljuje se za uloženi rad, zalaganje i ostvarene rezultate u zaštiti i spašavanju ljudi i materijalnih dobara od prirodnih i drugih nesreća.

Pohvalu dodeljuje komandant Federalnog, odnosno komandant kantonalnog i komandant općinskog štaba civilne zaštite, na prijedlog direktora Federalne, odnosno direktora kantonalne uprave civilne zaštite, a u općini na prijedlog rukovodioca službe civilne zaštite općine.

5. Novčane i materijalne nagrade civilne zaštite

Član 8.

Novčana nagrada dodjeljuje se u novcu.

Materijalna nagrada dodjeljuje se u materijalno-tehničkim sredstvima i opremi koja se odnosi na zaštitu i spašavanje ljudi i materijalnih dobara od prirodnih i drugih nesreća.

Novčane i materijalne nagrade iz st. 1. i 2. ovog člana, dodjeljuju komandanti štabova civilne zaštite na svim nivoima vlasti, rukovodioci federalnih i kantonalnih organa uprave i upravnih organizacija, a u općini općinski načelnik, odnosno u gradu gradonačelnik na prijedlog rukovodioca općinske, odnosno gradske službe civilne zaštite, a mogu ih dodjeljivati i rukovodioci privrednih društava i drugih pravnih lica.

III KRITERIJI ZA DODJELU PRIZNANJA I NAGRADA

Član 9.

Plaketa se dodjeljuju kolektivima i pojedincima iz člana 2. stav 2. ove uredbe, koji su nesebičnim radom i angažovanjem dali izuzetan doprinos u organizovanju, opremanju i jačanju sistema zaštite i spašavanja u Federaciji ili ispoljili izuzetnu hrabrost, humanost i samopožrtvovanje u zaštiti i spašavanju ljudi i materijalnih dobara od prirodnih i drugih nesreća.

Plaketa se može dodjeljivati i stranim vladinim i nevladinim organizacijama, udruženjima i institucijama i stranim građanima za ostvarenu saradnju i pruženu humanitarnu i drugu pomoć u vidu materijalno-tehničkih sredstava i druge pomoći u organizovanju i sprovođenju zaštite i spašavanja u Federaciji.

Zlatna značka se dodjeljuje pojedincima i stranim državljanima za postignute značajne rezultate u radu na organizovanju, opremanju i jačanju sistema zaštite i spašavanja u Federaciji i ispoljavanju hrabrosti u sprovođenju zaštite i spašavanja ljudi i materijalnih dobara od prirodnih i drugih nesreća.

Novčane i materijalne nagrade se dodjeljuju pojedincima, privrednim društvima i drugim pravnim licima, štabovima, jedinicama, povjerenicima i pripadnicima civilne zaštite, kao i službama zaštite i spašavanja za uspješan rad i ongažovanje u organizovanju i preduzimanju konkretnih mjera zaštite i spašavanja ljudi i materijalnih dobara od prirodnih i drugih nesreća.

IV POSTUPAK ZA DODJELU PRIZNANJA I NAGRADA

Član 10.

Priznanja i nagrade civilne zaštite dodjeljuje nadležni organ određen ovom uredbom na obrazložen prijedlog.

Prijedlog za dodjelu priznanja civilne zaštite mogu podnijeti štabovi, službe i jedinice civilne zaštite, kao i federalni i kantonalni organi uprave i upravne organizacije, odnosno općinska služba civilne zaštite, a u gradu gradska služba civilne zaštite.

Član 11.

Prijedlog za dodjelu priznanja i nagrada sadrži lične podatke kandidata, odnosno naziv pravnog lica koje se predlaže i vrstu priznanja. U obrazloženju se navode činjenice i radu i angažovanju i postignutim rezultatima i uspjesima na osnovu kojih se može odlučiti o dodjeli priznanja i nagrada civilne zaštite.

Prijedlog za dodjelu priznanja i nagrada dostavlja se na odlučivanje sljedećim organima:

1. za Plaketu-Federalnoj upravi civilne zaštite;
2. za Zlatnu značku-Federalnoj, odnosno kantonalnoj upravi civilne zaštite;
3. za Pismenu pohvalu-Federalnoj, odnosno kantonalnoj upravi civilne zaštite ili službi civilne zaštite općine;
4. za novčanu i materijalnu nagradu-nadležnim organima iz stava 3. člana 8. ove uredbe.

Priznanja i nagrade civilne zaštite uručuju se neposredno, a ako se dodjeljuju posthumno, predaju se članovima njegove uže porodice (bračni drug, djeca, roditelji, unuci, braća i sestra).

Organi iz stava 2. ovog člana, o dodijeljenim priznanjima i nagradama civilne zaštite vode evidenciju.

V FINANSIRANJE

Član 12.

Sredstva za dodjelu priznanja i nagrada civilne zaštite osiguravaju se na način predviđen u odredbi člana 180. Zakona.

VI ZAVRŠNA ODREDBA

Član 13.

Danom stupanja na snagu ove uredbe prestaje primjena propisa kojima se na području Federacije Bosne i Hercegovine bila uređena pitanja koja su regulisana ovom uredbom.

Član 14.

Ova uredba stupa na snagu osmog dana od dana objavljivanja u "Službenim novinama Federacije BiH".

V broj 129/04
15. aprila 2004. godine
Sarajevo

Premijer
dr. **Ahmet Hadžipašić**, s. r.

Na osnovu člana 193. stav 2. Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", broj 39/03 i 22/06), Vlada Federacije Bosne i Hercegovine, na prijedlog Federalne uprave civilne zaštite, donosi

UREDBU

O IZMJENAMA I DOPUNAMA UREDBE O VRSTI, KRITERIJIMA I POSTUPKU ZA DODJELU PRIZNANJA I NAGRADA CIVILNE ZAŠTITE

Član 1.

U Uredbi o vrsti, kriterijima i postupku za dodjelu priznanja i nagrada civilne zaštite ("Službene novine Federacije BiH", broj 23/04), u članu 5, stav 1. na kraju teksta pete rečenice tačka se zamjenjuje zarezom i dodaju riječi: "a u podnožju ploče smještena je pločica dimenzija 50 x 15 mm na kojoj je predviđeno ispisivanje podataka o dobitniku ovog priznanja".

Iza stava 2. dodaje se novi stav 3., koji glasi:

"Uz plaketu se dodjeljuje i poseban akt koji sadrži naziv plakete, lične podatke lica kome se plaketa dodjeljuje, kratak sadržaj razloga zbog kojih se tom licu dodjeljuje plaketa i potpis komandanta štaba".

U stavu 3. u prvom redu riječi: "sa odgovarajućom diplomom" brišu se.

Dosadašnji stav 3. postaje stav 4.

Član 2.

U članu 6. stav 1. mijenja se i glasi:

"Zlatna značka civilne zaštite (u daljnjem tekstu: Zlatna značka), po motivu, identična je Plaketi, ali bez lovorovog vijenca i grba Federacije Bosne i Hercegovine. Zlatna značka okruglog je oblika, prečnika 14 mm, a po površini reljefa i pozlačena 14 karatnim zlatom. U podnožju trougla ugravirana su slova CZ -C3. Na poledini značke pričvršćena je igla".

Iza stava 1. dodaje se novi stav 2., koji glasi:

"U kutiji u koju se smješta Zlatna značka smještena je pločica dimenzija 75x15 mm na kojoj je predviđeno ispisivanje podataka o dobitniku ovog priznanja. Uz značku se dodjeljuje i odluka o dodjeli značke, koja sadrži lične podatke lica kome se značka dodjeljuje, kraći rezultati rada zbog kojih se značka dodjeljuje i potpis komandanta štaba".

Dosadašnji stav 2. postaje stav 3.

Član 3.

U članu 8. iza stava 2. dodaje se novi stav 3., koji glasi:

"Uz nagrade iz st. 1. i 2. ovog člana nagrađeni dobija i odluku o dodjeli nagrade koja sadrži lične podatke nagrađenog, kraće podatke o rezultatima rada za dodijeljenu nagradu i potpis komandanta štaba".

Dosadašnji stav 3. postaje stav 4.

Član 4.

Iza člana 8. dodaje se novi član 8a., koji glasi:

"Član 8a.

Komadant Federalnog, odnosno komadant kantonalnog i općinskog štaba civilne zaštite, na prijedlog direktora Federalne, odnosno direktora kantonalne uprave civilne zaštite, a u općini na prijedlog rukovodioca službe civilne zaštite općine, može pojedincu, pravnom licu i drugim domaćim i međunarodnim institucijama koji su svojim ličnim angažovanjem doprinijeli izvršavanju određenih zadataka od značaja za zaštitu i spašavanje ljudi i materijalnih dobara na određenom području ili izvršili konkretan zadatak na zaštiti i spašavanju, dodijeliti pisanu zahvalnicu civilne zaštite.

Zahvalnica sadrži naziv štaba civilne zaštite, lične podatke primaoca zahvalnice, razloge za dodjelu zahvalnice, datum i potpis komandanta štaba".

Član 5.

Ova Uredba stupa na snagu narednog dana od dana objavljivanja u "Službenim novinama Federacije BiH".

V broj 383/06
6. jula 2006. godine
Sarajevo

Premijer
dr. **Ahmet Hadžipašić**, s. r.